

“MEHR KUTUBXONASI” LOYIHASI BILAN BIR KUN



Sarvinoz RAHIMOVA,
Alisher Navoiy nomidagi
O‘zbekiston Milliy kutubxonasining
Foydalanuvchilarga xizmat ko‘rsatish
xizmatining II toifa mutaxassisi

Bolalar kulgusi hamma narsadan ustun. Ular bizga olam-olam quvonch hadya etadi. Yurtimizda ularni “kelajak bunyodkorlari”, deya alqashadi. Afsuski, bizni qamrab olgan olamda ayrim bolalarning imkoniyati cheklangan. Quvonarlisi, mamlakatimizda rivojlanishida turli nuqsonlari bor hamda davolanishga va sog‘lomlashtirish-

ga muhtoj bo'lgan bolalarning ijtimoiy kafolatlarini ta'minlovchi chora-tadbirlar samaradorligini yanada oshirish, ularning ta'lim-tarbiya olishlari uchun moslashuv muhitini yaratish, imkoniyatlari cheklangan bolalar uchun ixtisoslashtirilgan ta'lim muassasalari (maktablar, maktab-internatlar) tashkil etish yuzasidan tizimli ravishda uzluksiz ishlar olib boriladi. Nafaqat ta'limda, balki jamiyatimizning har bir sohasida ular uchun turli imkoniyatlar yaratilmoqda. Masalan, kutubxonalarda (brayl va audio yozuvdagi kitoblar), jamoat transportlarida (maxsus joylar), bozor va do'konlarda ular uchun maxsus yo'laklar mavjud.

Birlashgan Millatlar Tashkiloti Bosh Assambleyasining 1992-yil 14-oktabrdagi qarori bilan 3-dekabr Xalqaro nogironlar kuni, deb e'lon qilingan. Ushbu sana butun dunyo bo'ylab keng nishonlanadi va bundan asosiy maqsad aqlan va jismonan nuqsoni bo'lgan fuqarolarni har tomonlama qo'llab-quvvatlashdan iborat.

Mamlakatimizda nogironligi bo'lgan insonlar – jamiyatning to'laqonli a'zolari, degan tamoyilga amal qilgan holda izchil ish olib borilmoqda. Bugun nogironligi bo'lgan shaxslarning bilim olishi, zamonaviy kasb-hunarlarni egallashi, o'z iste'dod va qobiliyatini ro'yobga chiqarishi, mehnat bilan band bo'lish uchun zarur imkoniyatlar yaratilmoqda. Yaratib berilayotgan imkoniyatlardan ular samarali foydalanib, hayotda yuksak marralarni egallashga qodir bo'lgan yoshlar safi kengaymoqda. Ular o'z qobiliyat va imkoniyatlarini to'liq namoyon etib, hayotda o'zining munosib o'rnini topmoqda.

O'zbekiston Respublikasi Prezidentining "2022–2026-yillarga mo'ljallangan Yangi O'zbekistonning taraqqiyot strategiyasi to'g'risida"gi Farmonining "Aholiga axborot-kutubxona xizmati ko'rsatishni yanada rivojlantirish, kitobxonlikni keng ommalashtirish hamda "Kitobsevar millat" umummilliy g'oyasini ro'yobga chiqarish" 72-maqsad 264–265- bandlarida ko'zda tutilgan vazifalarni amalga oshirish maqsadida bir qancha tadbirlar ko'zda tutilgan edi. Har tomonlama sog'lom kitobxonlarga emas balki, ijtimoiy himoyaga muhtoj, nogironligi bo'lgan, nafaqadagi kitobxonlarga ko'rsatiladigan kutubxona xizmati sifatini yaxshilash, ularning kitobga bo'lgan qiziqishlarini oshirish va ma'naviy yordam berish maqsadida «Mehr kutubxonasi» loyihasi joriy etilib, hozirgi kungacha amalga oshirilib kelinmoqda.

"Mehr kutubxonasi" loyihasi asosan sayyor tadbir bo'lib nafaqat maktab-internatlariga, balki mahalla fuqarolar yig'ini, hattoki bolalar da'volanayotgan

shifoxonalarda ham o'tkazilib kelinmoqda. Bu loyiha davomida imkoniyati cheklangan kitobxonlar qamrab olinadi. Ularning qobilayati va imkoniyatiga moslab kitob targ'ibotlari amalga oshiriladi. Shu bilan birga, mutolaa uchun tavsiya kitoblar etilib, sovg'a qilinadi.

"Mehr kutubxonasi" loyihasi har oyda 1 marotaba, "Kitobxonlik haftaligi" davomida, 1-iyun Xalqaro bolalarni himoya qilish kuni va 3- dekabr Xalqaro nogironlar kuni munosabati bilan ham amalga oshirilib kelinmoqda. Bu loyiha nafaqat O'zbekiston Milliy kutubxonasida, balki viloyat axborot-kutubxona markazi va tuman shahar axborot-kutubxona markazlarida ham amalga oshirilib, matbuotda va ijtimoiy tarmoqlarda yoritilmoqda. Shu jumladan, "O'zbekiston – kitobxonlar yurti" shiori ostidagi V Respublika "Kitobxonlik haftaligi" doirasida joriy yilning 24-aprel kuni O'zbekiston Milliy kutubxonasi mutaxassisleri bilan birgalikda Olmazor tumani 106-son zaif eshituvchi bolalar uchun ixtisoslashtirilgan maktab-internatida "Mehr kutubxonasi" loyihasi doirasida sayyor tadbir o'tkazdik. Ushbu tadbirimizga eshitishida, gapirishida nuqsoni bo'lgan, ammo harakati cheklanmagan 4-sinf o'quvchilari ishtirok etishdi. O'quvchilarning yuzidagi tabassum va beg'uborlik odamni qalbida o'zgacha tuyg'ularni qo'zg'aydi.

Bolalarning eshitishida muammosi bo'lsa-da, lekin ularning kitob mutolaasiga qiziqishlari baland. Bunday bolalarning zehni va ko'rish qobiliyati ancha ustun bo'lishi fanda isbotlanganiga yana bir bora amin bo'ldik. Eshitishda nuqsoni bo'lgan bolalardagi ko'ruv sezgisi va idroki eshituvchi bolalar darajasida bo'lishi rus psixolog va defektologi L.V.Zankov hamda pedagogika fanlari doktori, professor I.M.Solovev tadqiqotlarida dalillangan. Eshitishda nuqsoni bo'lgan bolalar eshituvchi bola e'tibor bermaydigan tashqi olam xususiyatlari va nozikliklariga ahamiyat beradi.

Biz shu fikrlarga tayangan holda, tadqiqot natijalarini amalga qo'llab ko'rish uchun biz "Ertak qahramonlarini top", "Farqini top", "Bu nimani anglatadi?" kabi o'yinlar tashkil qildik. Masalan, interfaol metodlardan biri bo'lgan "Farqini top" nomli metodimizni qo'laganimizda o'quvchilar 3–4 daqiqada tezkorlik bilan topishdi. Izohlab berishlarini so'raganimizda tilida sal nuqsoni bo'lsa-da, ko'zlari yonib, tushuntirib berishdi. Ayrim o'quvchilar esa imo-ishora tili orqali javob berdilar. Ushbu metodni oddiy ta'limda tahsil olayotgan sog'lom o'quvchilarga qo'llaganimizda 4-5 daqiqada topishgan. Demak, har qanday vaziyatda bo'lganda ham kitobga, ta'limga muhabbati bo'lgan bolaning aqliy qobiliyati ustun kelar ekan. Davomiy

mashg'ulotlar mashqlar jarayonida eshituvda nuqsoni bo'lgan bolalar eshituv idroki faollashtiriladi. Bunda eshituv idrokining rivojlanishi anotomo-fiziologik mexanizmining tiklanishi evaziga emas, balki eshituv idrokini faollashtirish yo'li bilan amalga oshadi.

Bunday o'yinlar bolaning yordamchi kognitiv rivojlanishiga hissa qo'shadi, xotirani o'rgatadi, bolalarning mantiqiy va tanqidiy fikrlashini rivojlantiradi. Bundan tashqari, tadbirning o'yin shakli ishtirokchilarning qiziqishini oshiradi. Ushbu loyiha tanqidiy fikrlashni rivojlantirishga yordam beradi, buning esa ahamiyati katta, chunki tanqidiy fikrlashi rivojlangan bola muvaffaqiyatli shaxsiy rivojlanish uchun zarur bo'lgan ko'nikmalarning butun majmuasiga, ya'ni kuzatish va o'z nuqtai nazarini asoslash, ma'lumotni o'zlashtirib olish va tahliliy ko'nikmalarni turli vaziyatlarda qo'llash qobiliyatiga ega bo'ladi.

Ma'lumki, kutubxonamizga nogironligi bo'lgan kitobxonlardan ko'ra har tomonlama sog'lom kitobxonlar ko'proq tashrif buyurishadi. Shunday kitobxonlarga har xil qiziqarli mashg'ulotlar yoki targ'ibotlar o'tkazamiz ular ham faol qatnashib, biz kutmagan savollarga javob berishadi. Ammo imkoniyati cheklangan kitobxonlarga shu mashg'ulotlarni o'tkazsak, ulardagi ishtiyoq, ko'zlari yonib javob berishlari hammamizni

lol qoldiradi. Kutubxonamizda ular uchun ovozlashtirilgan adabiyotlar va brayl yozuvidagi kitoblar mavjud. Imkoniyati chelangan va sog'lom kitobxonlar uchun hozirgi kunda kutubxonamizning ijtimoiy tarmoqlaridan masofaviy "Onlayn kitob mutolaa chat" klubi tashkil etildi. Ushbu klubda badiiy adabiyotlar yuzasidan har xil muzokaralar, savol-javoblar bo'ladi. Ushbu chatimizga bemalol masofadan turib turli yoshdagi va nogironligi bo'lgan kitobxonlar qatnashishi mumkin. Bu ham kitobga oshno o'quvchilar uchun sharoitdir.

So'zimni muxtasar qilib aytganda, imkoniyati cheklangan bo'lsa-da kitobga qiziqqan o'quvchilarni ko'rib, ular uchun yanada qiziqroq bo'lgan aqliy hujum metodlarni qo'llash, kutubxonaga tashrif buyura olishmasa-da masofadan turib ular bilan kitoblar yuzasidan savol-javoblar o'tkazish va, albatta, kitobxonlikka bo'lgan muhabbatini yanada oshirish, ular ham sog'lom kitobxonlar singari kitob mutolaasida faol bo'lishlarini ta'minlashni maqsad qilib qo'ydim. Zero, Doktor Oiz Qarniy aytganidek "Kimga kitob o'qish oson qilib qo'yilgan bo'lsa, shubhasiz, u inson baxtlidir. Chunki bunday inson olam bog'laridan gul-u mevalar uza oladi, dunyo ajoyibotlari hamda zamon va makon oralig'ida sayr eta oladi".